



奚囊蠹餘卷之十六

墓志銘

崔淑人李氏墓志銘



李淑人者指揮同知龍橋崔君繼宗配故指揮
僉事竹軒琳仲女也李系出中都崔出太原其
先皆皇明開國功受封杭州前右二衛世襲茲
土遂以聯姻吾杭俗固侈世胄之族恃有祿養
尤耽逸豫往往恣爲奢縱以是衛所多自相婚
姻豈故遠別於士民哉然余從弟子明實爲龍

橋壻龍橋歸武以文恂恂士君子也故雅好吾
弟儒素崔又少貧其舅氏李亦畧崔之迹而好
其文是豈尋常狗俗之見已邪本諸二姓可以
識淑人之賢矣按狀淑人諱瑛母蕭氏恭人以
弘治乙卯六月廿有六日生年十九而歸於崔
時崔翁樂閒以謝病屏居歲久無以自給里宅
久廢僦居民家徒四壁立淑人日黽勉中饋固
不戚戚俄而樂閒公卒凡棺槨衣衾諸歛具悉
出簪珥易之龍橋藉是得終大故如禮旣而龍

橋龍今官淑人謂祿位萬戶侯宜不為薄何至
以朝夕為慮迺節浮費量出人罄其奩資兼積
俸餘分命家僮貫貸以年什一又親為籍記稽
其盈縮竟以是獲稍溫厚俾龍橋無內顧憂淑
人兩舉女子生男子輒不育憮然語龍橋曰吾
聞不孝以無後為大君今四十無子不以此時
畜媿妾廣生育將忘滅祖宗汗馬勞耶為擇宜
男者二人已而果生子時龍橋始拓故居增構
堂室門第煥耀子女充閭淑人亦不色喜猶勤

儉如窮約時值有子妾喪淑人嗚嗚泣數行下
蓋傷呱呱失恃所憂念深矣三日而淑人亦歿
是為嘉靖丁未九月八日年僅五十有三嗚呼
葛覃樛木之風遠矣佚欲裕蠱妬悍離家始不
可一二數矧出世祿之家自富趨貧轉貧為富
終始不渝若淑人者能多見哉竹軒公義方之
訓龍橋君刑于之德咸可徵云所出二女子一
歸舉人張瀚即吾從弟一歸武舉鎮撫陳善道
所出子男二延齡延德女一許配李萬秀歿後
未幾奪何速延爾百世思賢淑

長姊鍾室張氏墓志銘

吾長姊歸鍾君梁以壬寅歲遘疾卒時余為郎
京師不能撫棺盡哀悽然傷心久之已得鍾君
書謂已筮地將歸藏焉宜有文以垂不朽願遂
志之余既痛不能言卒不忍以余不文使吾姊

壺德媿行無聞於後也為記憶作志曰姊諱某
吾先世汴人扈宋蹕南遷居仁和家世累仁集
義多聞人吾父封承德郎工部主事亭山公諱
某配封安人李氏是生姊姊上有三兄皆蚤世
姊生吾父母殊愛慎繼得諸弟妹慎逾于初姊
能周悉調護解衣推食以體親心十歲餘即儼
謚穎異宛如成人年十六而嫁鍾固鉅姓梁值
少孤家業中衰吾姊以勤儉相喻凡經營貨資
工作餼廩為之籍其出入蠶繅日夕劑量心煩

于慮而身親其勞乃鍾子亡內顧益脩藝飭
卒幹先人之蠱云歲癸未生子炳丁亥生子燦
吾姊皆口授書稍長遣就外傳俾習儒業嘗曰
讀書明理脩身匪直襲榮名銜鄉曲祇曰富貴
利達云爾於是二子篤行力學卓立不群孝友
尤深率母氏儀軌庶幾古人風焉巳亥吾母病
疽劇姊憂懣亦疽發乳吾母奄逝姊傷痛疽日
潰再踰歲竟以不起是為嘉靖廿又一年三月
二十三日距生正德丙寅春秋三十有七吾姊

生平寡言笑性敏慧通小學論語諸女史善楷
書尤精刺繡纂組一切女紅事姑祖姑極孝敬
卽嚴厲過責亦勉底豫卒以孝終嗚呼吾姊事
親承歡相夫克裕愛子能誨德宜壽也竟以天
邪往見炳燿侍吾姊疾歔天變食割臂充飲歷
久憔悴骨立吾謂孝感必應竟無益邪天道遠
邇不可測吾姊獲報寧無期邪悲夫鍾君以歲
癸卯十二月 日葬姊于 里 山之陽銘曰
秉懿承嘏若淑罔不昌明俾之殃貽厥嗣人開

爾芳宜此玄室兮有耿光

仲姊墓志銘

余先大夫有子九人其五女也所擇壻皆名族
儒生往歲余爲郎京師不二年三姊妹相繼天
歿所存仲姊少妹仲旣蚤寡少又差貧傷哉同
氣之感已昨秋余自西蜀再如京師寡姊又歿
於家歸而哀之蓋悲吾姊竟以憂戚亡而重增
今昔之痛也踰年李甥柱馳書閩中將以辛酉
歲十二月 日附葬姊於李君之壙乞余爲銘

嗟乎余誠不忍銘忍令吾姊無聞邪姊張氏諱
德良父工部主事亭山府君母封安人李氏嫁
爲太學生東壁李君妻東壁父曰槐軒公母顧
氏初槐軒僅有子東壁愛甚於勞東壁本個儻
不羈雅志高遠爲郡博士弟子員厭苦約束輸
貲入國學益廣交游後聞見於是增構堂室
多畜妾媵欲以高門戶蕃子嗣姊皆委曲承順
不拂其意庚子姊旣喪所生子東壁又客死濟
南姊泣輒欲絕旣而強起曰吾死無足惜

獨不忍李氏百世之祀一朝絕也徧召族人咸
謂兄昊有子宜嗣族固多欲爲東壁後者姊排
群議竟立昊子未幾天復以昊子繼之卽今李
甥枉寔順序當禮故不可奪也姊愛君已出稍
長教以儒業妻以余兄光祿公子兄固儒生姊
以婦似姑且兩世一姓肺腑之托滋重所爲培
植李氏計念深矣姊以三十而寡含荼飲血以
緩湏臾死者徒以枉在庶幾成立而養不逮悲
夫吾姊生慧婉先大夫愛逾諸男里有紐媪通

小學孝經女史先大夫延之家以書授姊盡得其指卒用以自淑雖猝罹凶變百務總總如蠅終安定不亂忍死存孤以保世業天植純懿誠異亦教敕漸潤有素也生正德庚午二月二十八日嘉靖庚申九月七日卒年五十有一東壁之喪先姊二十年所生男女五人多不育今惟二女子壻曰金佶邑庠生光祿少卿廷瑞之孫曰朱民建昌丞壁之子孫男一銘曰內則是依外傳是資令德令儀于時于歸天不勅遺逢

此百罹矢死靡渝繼絕持危爾宗百世繩繩自茲禮義詩書能忘爾貽

仲兄雙洲公墓志銘

余先君馴行孝謹口不言文章道德心切躬行身處富貴之中而樂朴素與閭里人游雖猥賤至忘爾汝閭里人其喜無驕氣親就亦忘其形又周人之急拯人之難舉貲於人往往折券棄責蓋坦然篤行君子也識者謂天道常與善人宜享上壽已而不踰七十仲兄雙洲公號克肖

子其積行累義恂恂浹洽動合先人遺槩人謂
公卽不上壽當與先人同筭無疑歲甲子纔五
十有五忽病疽不起嗟乎是天之報施善人非
邪次年余還自京哭公靈下因憶公平生爲志
曰公諱某字子易別號雙洲世仁和人工部都
水司主事亭山翁仲子也幼與余共學業舉子
不相入去爲商又不屑勤銖兩計羸縮歸自念
吾幸有先世餘貲稍自約當不之朝夕何迺
自苦效墮斷丈夫爲於是躬搆居室內外
整嚴有隙地卽樹藝草木灌花洗竹以爲娛容
至布碁局命尊俎雅歌投壺終日不倦或起興
深酌舉觥高嘯客非其任不力彊取自嚼之盡
醉乃已二三十年之間極遊燕之樂恣湖山之
觀偕昆朋之好抒幽曠之襟絲竹之聲不乏于
耳芬芳之色不絕于目其鮮之味不靳於口移
寒易暑不知老至名何必列儒林家何必多貨
殖悠悠樂事亦已偏矣邑有無賴丁某介其黨
求貸負公輒舉百餘金與之去三年來還途遇公

曰遠行良苦得利將三倍邪丁咈然去明日赴
御史臺訐富豪以高貴謀女爲妾女美而良不
願奉箕箒豪逼之父于命不保矣時御史某好
嚴刻往往以微事夷滅鉅姓亟檄郡收訊實無
女也御史終不釋強郡勿理誣執亦不償宿逋
時稱寃而公竟不求直客有爲公致冠帶之
者公感其意不直拒亦不服以示榮非所欲
公所友善傅給舍虛岩周侍御密菴高光州
沈比部南泉王豐城并山每每過之歡然

不忍去從弟中丞濂寓居於鄉雖宗黨亦鮮親
昵兄獨與相敬愛皆樂其質行無偽簡易可親
也公娶柱史吳萬松女生三子楷櫓皆治周易
爲諸生櫓倜儻克家諸子稍有過不譙讓第愀
然見面日更卽頽解如故於是諸子之率益謹
有四孫某皆幼生正德庚午十一月六日歿嘉
靖甲子八月六日余竊傷公之脩身善行而食
報未獲其常也悲夫楷等將以

年 月

日葬公 山之陽余謹銘於墓石曰思昔先子

不言躬行惟余仲氏克嗣令名耻彼壘斷快我
生平樹藝適意枰矢解醒貧交不厭達士心傾
由由與偕不失其貞枉不求直寡不務羸疇曰
未竟視厥所生疇曰未揚問諸鄉評千秋萬祀
奠此佳城

明處士彬齋李君墓志銘

余母贈淑人李出錢塘世家素積仁累義大父
榮號存德存德翁凡二男三女淑人翁少女也
長男龍溪禎次桐塢祥龍溪公配高氏是生彬

齋應文字子實少穎敏與余張高二姓兄弟行
若光州刺史應冕暨余輩同學爲儒業漸知趨
向矣值父喪家且中衰竟奪其志世遺坊里之
役方弱冠委身任之令以爲孺子解事不怠終
不犯令怒已乃薄遊吳吳中樂其和易所交接
多文墨士則又如梁楚入京師由金陵浮沅湘
自以快賞心因之量緩急通有無牟十一之利
庶幾俯仰無累克復舊業輒飄然歸更不復出
時母氏春秋高桐塢公又無後獨處彬齋皆曲

盡孝敬各得其歡相繼壽終殯葬如禮性好吟
時時咏歌適意嘗曰詩本自然之聲亦有自然
之節本乎性情隨感而發從心中律審其疾徐
協於音調信指合拍其亟稱高光州贈遺諸篇
謂雋逸有巧思效法中唐桀黷不爽分毫余詩
直率已見澹薄無色相詳味其旨若有妙悟見
得於性靈與其交游浸潤非必學力能然也夫
里閭少年不得爲儒生卽恣睢罔利不知詩書
理義爲何物甚者淫蕩不檢頽其家聲往往而

是溷跡高賈之中雅有文藝之好彬齋信有足
多者比其嫂也子先春走使淮甸乞銘墓石余
素知君且遺言命其子必托余言爲重悲夫余
言卽不足爲重忍負臨絕諄諄語哉距生正德
甲戌十二月二十一日卒隆慶元年正月十三
日年五十有四配顧氏子一卽先春女三長適
陳三綱次張治次葉懋林先春陳葉皆業儒孫
男一景葵西湖佳山水處龍山鍾塢之陽銘曰
仁甲德裔夙諳道藝聲詩天畀慧心妙契遨遊

事事幹盡用譽孝親不渝敬長克弟斯焉取斯
三姓相倚龍山佳氣潛臺是秘延休世世

明文林郎廣西潯州府貴縣知縣半村夏

公墓志銘

公諱美字宗美先名某以避世廟諱入仕後
乃改從字別號半村其先隴右人唐濟國公魯
才始遷浙之慈谿歷五季宋元代有聞人入明
若大理卿時正其顯著者也自千秋遷定海又
五世爲南京刑部郎中與誠始遷仁和生承事

郎醇醇生翰林侍詔樞聖賀孺人次金氏生公
少俊偉敏慧垂髫習禮成童授詩總髮游郡庠
補增廣生援例入南雍獲友四方英彥屢試上
等嘉靖戊子謁選天曹授貴州按察司經歷貴
陽地雜苗夷風氣稍異中土公在司幕以能稱
兼理有司之事如繕城池練兵馬運糧餉審軍
役點營堡理刑獄皆地方重務委攝都勻值凱
口烏撒土民相仇殺公躬歷其巢宣示朝廷
恩威咸感激聽撫按交章旌薦有才猷練達

操履清直等語乃擢貴縣縣務久弛至則振刷
脩飭首先學校治故瀕江城郭湫隘學宮舊在
郭外自內遷後久鮮科第公開拓舊址徙而新
之士咸感奮自是科目彬彬有人龍山三里徃
徃向梗縣化公爲建三老給以法服申諭禮制
遠近歸心遇徵輸以羊革裹糧相從邑中旣駭
且頌蓋前此未有也東橋顧司寇寄贈以詩有
看取漢家循吏傳獨憐卓茂最知名之句任凡
二三年屢列薦牘會當考績有一官陰伺之遂愾

然歸次東津驛賦詩云雨霽東津日未晡洗添
新綠岸頭蘆而今歸買西湖棹不向潯江聽鷓
鴒歸田後詩酒自娛構小圃藝蔬種樹掩映書
屋自題曰習懶歸彭澤遺安卧鹿門親友相過
談棊論詩出所藏圖書把玩任客去留皆樂其
率直卒無忤也善吟咏垂老不廢蕪及繪事亦
如其詩有半村稿藏於家先是濟國墓在慈谿
夏輿歲久漸廢公欷歔憤嘆控訴於官勞瘁十
年盡復舊業乃已嘗誨諸子曰吾家自比部占

籍仁和已而廷尉內翰鷄澤孝感英山後先相
望吾獨不能繼述汝等其勉紹家聲今子若孫
果奮志有聞嗚呼公可謂克承世業胎謀允臧
矣距生弘治癸丑三月十九日卒隆慶丁卯七
月二十八日享年七十有五配鄭孺人生子男
三長垠次邴次培皆業儒女一適大理卿東瀛
陳公孫文灝孫男九鏗鏜鏞鈞鏗鉞鈇女十陳
香陳重光虞九經其壻也餘與曾孫女二俱幼
垠等十以次年 月 日祔葬於八都二五山
德弗訓哉

之陽從先兆也銘曰植本厚其末茂勲伐售視
厥後於赫濟國開先良舊衍及仁明文林應宿
通矣膚功塞焉解綬貽厥未究其胤孔秀信無
銘

明杭州前衛中所正千戶麓泉陳君墓志

嗚呼是麓泉陳君墓也往余別君吳山里第時
方病風差瘥猶談咲引滿眷眷與夫別未踰年
君竟以是不起悲夫君有投筆請纓之志今已

矣時四方多事 聖皇拊髀思將帥之臣以君
才智假令乘時見志曷功閩外所就顧可量邪
悲夫按狀君諱官懋字子政麓泉其自號也先
世居德安七世祖端賢由元進士倅括蒼因家
剡端賢生隆九以功授紹興路總管生紹興守
禦使勝明興奪勝官編籍杭州前衛遂徙居錢
塘傳至奉政公昱以子東瀛公珂貴贈刑部郎
中大夫諡文獻公起家進士歷官右副都御史進大理
少卿入王氏以弘治己未八月八日生君

自幼英敏倜儻有大志涉獵經史不屑屑章句
尤好左氏春秋及孫武子兵法弱冠隨東瀛公
任閩中值盜起大帽山郡縣不能制君乃請從
擊賊賊平上功幕府授本衛中所正千戶未幾
湖賊湯毛九等匿安吉山中四出劫掠時大方
伯何公天衢廉君才檄君專捕緝賊果就擒功
聞得拜金幣之 賜已而東瀛公解組歸君亦
弃官屏居時諸第咸幼君獨綜里家政一切事
事皆身親其勞不以煩於親慮以是東瀛公得

無內顧優游林壑未終天年寔君孝養以娛悅
其志也迨東瀛公歿王淑人亦歿君喟然嘆曰
余昔有狗馬之心冀効尺寸時平莫展其伎將
尚所以自適繼先人之志惟吾子若孫耳廼築
室西湖之曲題曰漁隱約二三知舊定爲社會
觴咏爲歡又時訓課諸子俾與於學今其子若
孫果皆明經績文補學官弟子咸彬彬知奮云
君生平和易易親悖睦宗族周卹貧乏謹祭享
樂朋好處富貴善自謙抑士大夫咸以是多君

樂與之交然直諒不詭不妄悅人疾惡幾甚故
群小不無少訾君亦終率其性弗恤也嗚呼君
簪纓世家所居易溺乃一念尚惟樹立不忘報
國承家雖數竒不遇然猶出其十一明試功能
再受 封賚非泯沒無聞矣世乃有游閒公子
藉世祿之資統綺膏梁侈然驕其里閭而審其
智慮曾不能辨菽麥視麓泉君何如哉君歿嘉
靖庚戌九月三十日春秋五十有二娶張宜人
生子男四長文瀚次文灝文濟文藻孫男五長

椿餘尚幼濟藻椿皆生冒濟先君卒女一適余
子懷孫女亦五一許白戶侯子其餘亦幼歿後
二年爲壬子歲 月 日文瀚等將奉君柩葬
南山楓篁嶺之原從祖兆也銘曰南山有虎其
變爲豹文豈不耀武功是効旣懋厥功亦繩厥
宗高蹈令終頽靡以風隰有脩篁原有青楓維
子之宮垂蔭無窮

明贈徵仕郎中書舍人玉泉林公暨配贈

太孺人張氏合葬墓表

贈中書舍人玉泉林公諱奇字子俊世爲錢塘
人高祖贈通議大夫太常寺卿仲英英生才才
生秀秀生靜得處士巒巒有儒行宮保尚書胡
端敏公剛正寡交獨與厚善娶施氏生公與異
母兄宏爭相淬礪補邑博士弟子員飭躬善行
懋學績文聲藉藉起質本清癯重以勞瘁傷心
嘔血忽忽而歿性曠達不事家人生產作業舉
貲於人負者多不較事親孝處昆弟友與人和
易可親鄉人無遠近少長咸敬而愛之卒嘉靖

丁酉年僅三十二配余姊贈奉直大夫吏部員外郎應禎長女奉直公雅愛之擇所歸適玉泉身出世家嫁爲世家婦絕無驕泰事舅姑相夫子克慎於禮玉泉夫亡時遺孤僅四歲孺人抱而泣曰吾當從夫地下徒以呱呱兒緩死也自是不復近金珠羅綺蔬食布衣以儉嗇保其田廬尤珍藏遺書孤梓稍解事手舉授之誨以無忘先志方幾望有成而不克待矣卒嘉靖戊申年四十四詳見余弟中丞濂所爲志中後七年

乙卯梓果舉於鄉又七年成進士授中書舍人奉使南還傷其親之不及見矧二本猶在淺土爰卜地西谿之鍾山如遷葬成禮焉又三年梓以秩滿例得贈父如其官母曰孺人制詞褒嘉闡揚潛德允慰孝思矣則又乞余文勒石墓上表諸人人余以天道難測有時而易人事不足恃亦不盡然方自得誄於時齋其志以畀二子視青紫功名不啻執契券索負然彼以世積徵諸天力學驗諸人也竟之一命之榮及梓幼

失怙恃僅以延其世系如綫不絕幸已奚意有
聞於時卒起家進士列侍從爲法曹駸駸位望
未涯何前嗇後裕耶數之所塞力有不能達理
之所開天有不得靳誠易測而可恃已世有不
務修身俟命僥倖未定之天蓋思所以昌熾而
後也其諸慎厥詒謀哉

奚囊蠹餘卷之十六

奚囊蠹餘卷之十七

行狀行畧

從兄東川公行狀

公諱洪字子容東川其自號云余族世籍河南
始祖某徙自汴京占籍錢塘高祖某遷仁和明
性理之學通經史百家言多著作我宗詩禮之
傳自高祖始曾大父某大父某是生愛山公愛
山公諱某後以季子貴贈吏部員外郎與余先
大夫同母出先大夫出後余祖故于公稱從兄

愛山公有丈夫子八人公嫡長也生穎敏倜儻
不羈能讀先世遺書業舉子爲制科文詞駸駸
成矣輒弃去習孫吳試劍爲搏戰勇已兼人則
又弃去挾高訾遊吳中通海鹽徵貴賤凡歷艱
險悉心計織嗇筋力孳孳二十餘年乃益致富
羨然不爲異財別產悉歸愛山公愛山公以是
得優游家庭增構典籍延致師友旦夕課諸子
委心無他者寔公勞苦於外以陰齎之也巳而
嘆曰大丈夫不能奮鴻鵠之翼赴風雲之會以

文雅雄悍垂功名竹帛而庸庸逐銖兩商販問
何以自明其志邪於是盡弃所嘗經營日泛覽
群書因訓迪其子暇則與諸弟商確古今或對
客彈碁六博登山臨水窮險極幽怡然若有所
得嘗憇北峯之巔爲詩曰躡足千仞危山風逐
衣颺徘徊蒼莽間飛鳥度青嶂聊陳一杯酒洒
洒多嘉况時當杪秋信宿山寺遇夜則又爲歌
曰天肅殺兮涼襲衣月流彩兮烏鵲啼撫景寥
寂兮掩竹扉孤燈幢幢兮暖幽惟時序疾兮思

徘徊萬物變兮心孔悲語義悽惋若憤懣不能
平者時季弟為選曹郎公忽給其家曰欲再入
吳尋舊游為樂竟買舟長往歷齊魯燕冀不遠
數千里訪弟長安旅邸曰選曹進退人才登崇
賢豪博採輿論為國得人民且受庇甚盛事
也人所屬意子盍慎之吾今知所學皆不適用
吾其歸老矣強留之數日怏怏不甘飲食雖
宮闕雄麗不一觀望縉紳續紛不一交接飄然
南歸蓋晦迹以避請托防自黜以貽弟耳弟感

其言為出俸給納宗府引禮舍人榮之非其
志也歸即疽發背浸劇猶口占曰匣劍渾無用
熊經徒自誇醉中輸一局夢裏演三車自是不
復起矣歿之日為嘉靖戊申十月十五距生弘
治己未十一月二十一日春秋五十爾所著有
東川稿二卷藏于家公生平剛毅簡直與人語
恣其劇談不為巽避稍不協輒面折不能容即
遇顯貴人不過為禮然故舊交驩雖甚貧賤不
遺有緩急相投忘利害為之啻人亦以此多之

初愛山公疾篤自以多男子又異母出忽忽爲
身後憂公乃跽進曰大人幸自愛兒輩終不以
財貨之故傷天倫後果交相讓一無間言公以
孝友率先諸弟類如此馭僮僕嚴而有恩會有
遘眚疾者醫謂不祥邇之將傳染爲厲公咲曰
少盡其力老弃其身仁者不爲矧老且疾邪至
躬親湯藥迨死不弃居常不喜飲酒無紛華綺
糜之習不惑於浮屠言惓惓誨其子卒業儒庶
酬素志惜哉子且垂成而公不待矣悲夫卽公

所自期待若舉天下事無不可爲使當一命之
寄舒展意氣必將有所建立不泯泯無聞也而
令壯歲蹉跎徒以五字沈吟鬱鬱負志以歿天
降之才何心哉先配盛氏生子男曰榜補郡博
士弟子女一適蔣需盛先公十年卒繼娶金氏
生一女許聘徐浣金亦先公數月卒庶出女四
人一適蔣孜一許唐某餘幼榜將以次年冬月
扶公柩詣靈鷲山先塋啓其其母之壙與繼母
同窆焉欲乞銘墓石而屬余狀其行就所睹記

敬列如右

成都知府邵公行狀

嘉靖戊午九月七日故成都郡守邵公卒里第是歲予將使蜀使道來還其子棠生取公所自編年譜丐予作狀予從弟潔爲公子婿代懇尤切不得以蕪拙爲解漫摘所編事敘之曰公姓邵諱經濟字仲才別號泉厓宋康節先生之苗裔也南渡時自汴居杭世爲仁和人高祖純曾祖信祖宗父鑑以公貴封榮繕員外郎母楊氏

宜人以弘治癸丑七夕生公幼多智慧稍長習毛詩受家學於營繕公勤勵日進甲戌督學徐公蕃選充邑庠弟子員譽望藉甚尤見賞于西蜀劉公瑞收列正員壬午舉于鄉癸未卒業成均時嚴少師嵩爲司成器重之因與趙尚書文華同舍相友善丙戌舉進士值揚宜人喪未授官歸己丑補工部主事專理清江漕船廠多積弊易汚公爲立規程嚴稽察事集而積羨倍昔有所集濟漕補畧可考任滿進員外郎督理臨

清甌敞區畫釐正如在淮時甲午進郎中督易
州敞先是各錢糧解敞多留難公隨至即發收
迺無留難又爲節車輛之費定輸納之期商民
稱便乙未擢守成都成都劇郡訟獄既繁部使
監司沾沾指拾缺失公勾稽酬答事皆曲中歲
旱竭誠祈雨匍匐壇壝自爲祝文泣與神誓遂
得雨如注農賴有秋存撫之暇訪求名宦鄉賢
祠於大益書院郡縣學宮稍敞輒爲完繕至昭
烈武侯陵祠少陵君平遺墟凡郡中先哲祠宇

並脩飾崇祀以風勵百姓又博選茂才異等集
書院躬自教育間爲授之章句稽其勤怠於是
士爭嚮風互相砥礪後歲大比褒然首選者多
省下士今御史中丞王詢張景賢周郡守倣尤
爲知己會當入覲撫按皆薦公賢能不宜久淹
外郡未報值營繕公歿公歸自成都是議其
後者起矣公聞之曰生本微賤幸得備位明盛
仕至二千石不爲卑薄人不我與已矣夫遂不
復出郡人劉丹崖士元作德星亭記紀公治行

表遺思彼其親見行事宜非空言也家居以來
每好出遊嘗入龍虎山登匡廬齊雲浮舟鄱陽
富春淞泖遇當心處多信口爲歌詞自適比趙
尚書督師入吳則往與之俱張中丞撫南畿歷
雲間亦往雲間王中丞飭兵海上嘗往鄆周郡
守守信又往信率歲凡數往不厭殆苦城市喧
囂浪跡山川探竒涉險發舒曾臆以爲娛不相
諒者顧謂公宦遊已久何所不真猶營營遠役
至有他疑豈其欲耶歿之日_以呼兒女輩命

以後事出所畜畝若干金分逮所親有差蓋公素
織罽深藏雖家人不知其有也所著詩文凡二
十卷生弘治癸丑歿之年六十有六配丘氏封
宜人先公八年卒子男二長棠生庠生次棣生
女二長卽予從弟婦次許江埭禮部員外郎曜
之子孫男三承庶承熙承默孫女承孝棠生等
將以次年葬公玉泉山塋啓丘宜人之壙合窆
焉宜有銘以垂不朽聊述大都畀藉于名公
得采擇焉

唐府典儀正柴淳齋行狀

公姓柴氏諱龍字舜臣別號淳齋仁和人也宋南渡時有諱士宗者自汴扈蹕來杭因占籍焉歷傳至政政生質質以勤儉起家益開拓其先業有丈夫子二長靜菴銘次巽菴嵩嵩取南安郡守竹軒毛公女生三男子伯夔季臯公仲子也以弘治己未正月二十六日生而端凝不爲兒戲靜菴公愛之請以爲嗣靜菴配張氏得公愛尤甚無何張卒公方童稚哀毀執禮不異

成人靜菴固嚴毅難悅稍不慊卽盛氣厲聲家人咸嗃嗃公曲爲愉婉務得歡心逮歿哀毀執禮如其幼時自是歲時享祀必戚然悽愴思慕終身抗俗侈靡千金之家率以服飾輿馬侘里閨公獨敦儉朴所服布素數浣綴不厭深居簡出出又深自斂束不踰分爲高車與人交直諒不疑舉貲於人人有負者輒折券不責償遇貧乏及婚喪緩急厚卹不恡嘗曰吾寧損己益人必不害人利己然性善喜負殖物值貴賤皆能預

料盈縮終始不爽又不緇銖取盈以是漸積饒裕非夫憑藉恣睢干禁壘斷歛衆怨以猝富也往年中舍君舉於鄉時方弱冠公自以僅一子當遠離念之不置中舍君承其意留止不上春官已而屢上不中公固不允也迨中舍君登進士高第授官奉使西藩便道歸省當是時司省郡縣諸大夫暨鄉縉紳士咸走賀里第冠蓋填門中舍君又爲公輸貲得授將仕郎唐府典儀正父子被服彩繡一時貴盛矣公亦不色喜

顧愈自謙抑惇篤故舊卽市井猥賤亦必溫溫款曲人稱鞠躬長者謂淳齋稱實云歿之日省城內外知與不知無老壯皆爲咨嗟嘆惜彼其忠實心誠信於人也中舍君又謂余曰先君於物無好而好覽史傳涉獵往迹恒以已意評其是非多出於人意表守身極慎隆冬盛暑不出內戶小有疾便偃卧累日非全愈不强起處吾叔友對五母如賓教子無疾言厲色外祖南安公歿後益衰子孫至不能保廬舍已又將及

其墓道石坊先君聞之惻然曰榛莽之中知有
毛南安者恃此尺寸石耳蕩廢可至是乎爲償
其值得無廢其念田於輕重類如是晚築圃城西
穴池結亭雜植花卉時偕親友倘佯其間一日
折花對客曰花誠美麗幸與諸君劇飲明年花
發時不知幾人存也悲夫是歲之夏爲嘉靖丁
巳六月十九日一疾竟卒公於生死豈能預料
不爽耶亦其心誠實誠故明達非必身中其言
公聚散常理如然爾兄歷春秋五十有九配曰
氏生子二長禎早夭次祥卽中舍君女二長適
余弟洽兵部武選司郎中次適庠生陳文濟大
廷尉東瀛公孫也孫男二長應椿聘余孫女次
應楠余於公家今昔聯姻積素累舊締好知公
宜莫如余併以所聞中舍君言敬爲序狀如右
冀立言君子採而銘之

高祖介然公行畧

介然張先生初諱某後更諱某字羽皋本洛陽
人仕於汴始祖諱某者扈宋南渡遂爲錢塘人

父彬以貲雄里中我 明天下初定嘗輸粟給
邊至通籍司農曰富戶母王氏以洪武甲戌生
先生自幼穎異噐宇冲粹少長精研儒術探抉
微眇五經六緯靡不浹洽而周易尤爲顯門旁
及九流百家技藝至推步天文占風望氣竒驗
出自性靈無假師授先生旣深味道腴頗厭弃
財貨迨終親喪徙居仁和高訾悉歸其兄自是
脩學益邃聲聞藉藉宣德間兩廣多事時潘中
丞某將往視師雅聞先生自行迎除舍先生爲

設策乃請與俱凡所遣調一 嘯指畫一日坐嘔
中望片雲隱隱起離震間謂潘曰事濟矣有頃
烈風南來此捷音也已而果然會潘欲䟽請
召用先生誓不仕輒晦跡間道趣還易後名故
先生之名卒不顯晚歲卜居東西壁遊心著述
所爲詩文多不傳傳者若自述云有意欲嘗千
日酒無心去傍五侯烟夜寒荷葉杯中飲春暖
梅花帳底眠題像云丹青點染苦勞神寫出緣
何喚作真自己幻軀留不得却從身外更求身

臨終云我生原有數數盡復歸元來往自然理
何須求異端並根極理奧非苟言之也姚江馮
蘭輩以易學號知名士間從質難先生時年八
十餘對衆劇談一坐皆傾至羅拜執弟子禮去
年八十有二無疾終今子孫多以文學政行表
見當世明經世其家云

大父質庵公行畧

大父質庵府君諱某字用綱上世出洛陽仕宋
於汴南渡時扈蹕駐杭遂占籍錢塘當始祖時

吾宗素饒益高祖某雅尚文學禮義盡以推讓
其兄所取不及十一遂析居仁和之義和里而
曾祖某以下始為仁和人妣毛氏南安郡守母
弟也有丈夫子四人伯授散官仲贈通議大夫
季封承德郎皆有稱號府君以景泰辛未人日
生幼稟竒秀授書輒通大義頹清弱不任煩勞
居常苦疾患恐年壽不永為父母憂每以親醫
藥廢誦習然終身意不能忘垂二十始娶終以
多病鮮生育所育仲兄子竟以為嗣即先子亭

山君也間出累歲所乞諸家禁方脩合藥餌旦
夕孜孜不厭歲率費百餘金施人無不立應遠
近來請如市竟不取償一錢歷三十餘年歲復
辛未再得孫里中父老咸詣賀曰德積厚矣是
兒生不偶也日者又推論五行不賤府君心竊
喜字之室中與大母孫淑人鍾愛出諸孫上成
童遣就外傳居常謂某曰曆火寒灰之下積薪
其上光焰燭天美在其中發於事業如此無
不然薪不積易滅敏而好學不富若是邪又

陶冶不持斧斤追琢不施楮聖凡業貴精專乃
成博綜遠獵得無兼及而不工乎自是某始知
趨向專意經傳然卒不能率教以副所期待固
多也生平不惑於佛老素奉儉約習俗奢溢僭
差視之厭苦若將挽焉惟歲時追祀祖先必嚴
潔致敬宗族親故有不贍輒分所餘振之鄉人
無遠近大小莫不愛慕里中首舉高年有德為
鄉飲賓郡守敦請累歲竟不一赴八十後又舉
加冠帶亦不赴但謝曰吾德薄不足以辱盛典

嘉靖壬辰二月壽終後二歲而某舉於鄉又三十餘年今上登極覃恩以某總督漕運得贈兵部左侍郎兼都察院右僉都御史嗚呼學道無成仕無偉績茲老矣僅僅以一命賁丘壠某之罪負可勝言哉聊記憶行誼大畧將以丐於立言君子表章潛德切有望焉

先考亭山府君行畧

先大夫亭山府君諱某字元錫生成化辛丑九月二十五日自少端慎爽朗有成人之度與諸

昆弟贈吏部員外郎愛山公刑部主事兩山公蘇州府倅封兵部主事半山公齒相若也以文業行誼相砥礪後刑部蘇州相繼登甲科仕有祿秩府君與吏部咸奉例輸貫幾均王寄一命以自表見值大父夙嬰弱疾不忍以遠遊廢定省竟弃所入昔與吾母李淑人共極孝養食飲必躬佐烹飪乃敢上大父既耄益多疾常在床箦時時侍湯藥無間寒暑已而考終盡哀毀瘠見者為之隕涕終事詳慎以禮伯兄嚴毅稍不懌

輒厲聲色府君俛首長跼稱說委順繼之以泣
兄每爲感動罷去晚歲相與驩甚間私語曰弟
德度醇篤恢閔非所及吾不能享祿養生沐
恩光如弟已疇昔有言能無忘之當是時府君
已膺承德封而兄子中丞濂始有南宮之捷自
是兄竟不祿府君追思遺言悲慟無已故郡人
無間識不識咸稱孝友府君愈自損抑有司歲
舉鄉飲郡守李公冕躬詣懇請僅一赴成禮而
已益脩締故交金太史近山童封君賓山高封

君東園金山人蕉泉皆以詩酒娛悅結亭泛艇
徜徉湖山悠然樂也雅不好治生舉貲於人往
往見負不較久乃漸廢落吾母以爲憂府君曰
義利不同途富貴不兼得既自勉遵禮義顯有
榮稱卽富厚非所宜擅又嘗謂某日兒往試吏
得無私家是恤故廬無恙薄田不乏朝夕無庸
增益慎守節廉以求終與暮年之奉不需汝爲
給也悲夫親誠無藉祿養不孝竟不能躬奉左
右承一日之顏豈所以其爲子職哉府君生平

樂易犯而不校喜稱人之善不顯言人過失雖
訓諸子亦無暴色嚴聲吾母又以慈愛相之家
庭之間雍雍如也與人亦卒無忤史稱敦厚慈
孝君子長者何以加焉吾母以己亥七月歿又
七年當嘉靖丙午府君與客夜泛舟渴飲湖水
遂患脾泄不起某守廬陽委身公家湯藥不侍
殯歛不親終天之恨忍言哉忍言哉詳見督學
憲使豫陽田君所為志中始嘉靖丙申 先皇
帝以祀 天覃恩封南京工部主事母曰安人

隆慶元年 今上御極 詔例得加贈兵部左
侍郎兼都察院右僉都御史母曰淑人 誥勅
褒嘉兩詞粹美人謂當其實云

交泰彙書餘卷之十七



